

1 Tesalonicenses

**Pablo Tesalonicaibi tiyac
quiriccunama cai cartata quillcan**

1 ¹Ñáucahuas, Silvanohuas,
Timoteohuas quillcauchi canguna
Tesalonicaibi tiyac quiriccunama.
Canguna quirishcamandami Yaya
Diospa churi manguichi, Señor
Jesucristohuacpas manguichi.
Cangunata llaquisha cungailla
causaitas cuchun nisha mañani.

²Tucui uras Diosta cangunamanda
mañausha paita pagrachu niunchi.
³Paita quirishcamandami paihuacta
rasha causaunguichi, llaquishcamanda
shuccunatas yanapanguichi. Ñáucanchi
Señor Jesucristo shamunata chapausha
ahuantaunguichi. Ñáucanchi tucui
uras Yaya Diosta tapunchi canguna
chasna causaushcata yuyarisha.

⁴Dios cangunata llaquisha pai
ñuca churiguna tucunauchun
nisha japishtataga sirtupacha
yachanchi huauquigua. ⁵Ñáucanchi
cangunama Diospa quishpina shimita
mana yanga rimasha camachicpi,
randi Diospa Samai ushaimanda
yuyaihuau camachicpi cai shimiga
sirtu man nisha yacharanguichi.
Chasnallata cangunaraicu
ñucanchi alita causaushcata
yacharanguichimi. ⁶Canguna
ashcata turmintariushallatami
Diospa Samai cushca cushi shimita
japiranguichi. Chasna japishtami

ñucanchi puriushcashina, Señor
Jesucristo puriushcashinahuas
puriranguichi. ⁷Chasna purisha tucui
Macedonia Acaya provinciagunaibi
tiyac quiric runagunata, ali
causanata ricuchiranguichi.
⁸Ñáa mana chi provinciagunallai,
astahuuanbas tucui llactagunai
tiyac runagunahuas canguna
Diosta quirishcatas uyashcaunami.
Chiraicumí cangunamanda mana mas
rimanchichu.

⁹Paiguallatami cangunamanda
rimanaun ñucanchi cangunahuacpi
pactashcaibi mana cáilla cushihuan
yaicuchihuaranguichi nishami
rimanaun. Chasnallata canguna yanga
dioscunata saquisha causac Diosta
catingahua callarishcanguichi nishami
rimahuanaura. Yaya Diosca sirtu Dios
man, paihuacta cunan raunguichi
nishami rimanaun. ¹⁰Paihua churi
Jesus huañushcamanda cuti causaricta,
cunanga pai jahuapachamanda
shamunata chapasha aunguichimi
nishami rimahuanaura. Jesusca
manzhanayacta taripanagunamandas
ñucanchita quishpichingami.

**Pablo Tesalonica runagunahuacpi
causashcata riman**

2 ¹Canguna yachanguichimi
huauquigua, ñucanchi
cangunahuacpi camachisha puriushcaga
mana yangachara astahuuanbas

canguna alitami quiriranguichi.
²Yachanguichimi ñucanchita
 Filipos llactaibi turmintachisha
 piñaitucushcata, chasna acpihuas
 cangunahuagma shamuranchimi.
 Canguna llactaibis shuccuna
 ñucanchita saquichinata munagllaitami
 Dios ñucanchita yanapashcamanda
 paihua quishpina shimitaga mana
 manzhasha camachiranchi.

³⁻⁴Ñaucanchi yachachishca
 shimiga mana yanga umasha
 rimashca shimichara. Yaya Diosca
 ñucanchita japiroami paihua
 quishpina shimita camachingahua
 nisha. Cangunata mana llullasha
 camachiranchi, canguna ima
 jiridsata causanauchun nishami
 yachachiranchi. Mana runagunata
 cushiyachingahua astahuanbas
 Diosta cushiyachingahuami
 camachiuranchi. Diosca ñucanchi
 shunguta yachanmi. ⁵Canguna
 ñucanchita mana llaquinauchun
 nishalla camachiranchichu. Diosmi
 yachan ñucanchi mana cullquita
 ganangahualla camachishcata.
⁶Cangunahuas shuccunahuas
 ñucanchita shuc mandac
 amutacuinta balichichun nisha mana
 munaranchichu.

Ñaucanchi Jesucristo japisha
 camachigrichi nisha cachashca
 runa ashcamanda imatas cangunata
 tapuima aranchi causangahua. Chasna
 agllaita mana chasna raranchichu.
⁷Astahuanbas shuc mama paihua
 huahuata cuirashcacuinta ñucanchi
 cangunata cuirasha tiyauranchi.
⁸Cangunata yapa llaquishcamandami
 ashca cushihuan Diospa quishpina
 shimita camachiranchi. Chasnallata
 cangunata yapa llaquishcamandami
 mana quiriccuna ñucanchita
 huanchinauchun nicpihuas

cangunata yachachishun niranchi.
⁹Diospa quishpina shimita ñucanchi
 yachachiushcabi canguna alita
 yacharanguichimi ñucanchi
 causairaicum quiquin maquihuan
 tarabauranchi. Tutandi punzhandimi
 tarabauranchi cangunata ima
 quillachingahua nisha.

¹⁰Canguna yachanguichi, Diospas
 yachanmi imasna tucui canguna
 quiriccunahuacpi alita cuscata
 purisha causaranchi. Ñaucanchi
 alita rasha purishcamandami pihuas
 mana ushanzhu ima mana ali
 shimita rimanatas. ¹¹⁻¹²Shuc yaya
 paihua huahuata yachachishcacuinta
 ñucanchihuas cangunata cushihuan
 yachachisha yanaparanchi,
 sinzhiyachiranchi canguna Dios
 munashcashina causangahua nisha.
 Diosca paihua causaita cangunama
 cusha nishami japira paihua
 huahuashina tucunauchun nisha.

¹³Tucui uras Diosta pagrachu
 ninchi paihua quishpina shimita
 ñucanchima camachishcata canguna
 uyasha quirishcamanda. Mana runa
 yuyaimandachan astahuanbas cai
 shimiga Diospagmada man nisha
 chasna alita quiriranguichi. Sirtupacha
 ñucanchi rimashca shimiga Dios
 rimashca man. Paihua causana shimi
 canguna causaita alita cambiaunmi.

Cangunata turmintachishca ashcanguichi

¹⁴Yuyarichi llaquishca huauquiguna.
 Judea llactaibiga israelpurallatami
 Jesucristota mana quiriccuna Diospa
 runagunata turmintachinaura. Chi
 quiriccunata turmintachishcacuintami
 canguna llactamanda runagunallata
 cangunataga turmintachinaunga.
 Chicuinctallata cangunata
 turmintachicpihuas ahuantashami

cunanga causaunguichi.¹⁵ Chi mana quiric israelgunami Señor Jesustaga huanchinaura. Ñáupa timpu paiguna huañuc apayayagunahuas Dios rimashcata pasachic runagunataga chasnallatami huanchic ashcauna. Cunanga ñucanchitas piñashami paiguna llactamandaga callpachitucuranchi. Chasna rashami Diostaga mana cushiyachinaun. Chasnallata tucui quirisha niuc runagunatas saquichishun ninaun.¹⁶ Ñáucanchi mana-israel runagunata Jesuspa quishpina shimita camachiucihiwas chi mana quiric israelgunaga ima quirinauchun nishami ñucanchitaga saquichinata munanaura. Chimandami paiguna jucha mas yapachishcacuinta ashca ara. Chimandami cunanga Dios paigunata piñasha ashcata libachin.

**Pablo Tesalonica llactama
bulltiamunata munara**

¹⁷ Ñáucanchi cangunahuagmarda rishca urasmandapacha, cangunata mana cungarishcanchichu huauquiguna. Mana unayashunzhu cangunata ricusha bulltiasha shamunata yapa munaranchi.

¹⁸ Cuti cangunahuagma shamushun nishcanchi, ñucaga ashca cutin alichishcani shamungahua nisha. Chasna agllaita supaimi ñucanchita saquichira.¹⁹ Chasna acpihiwas ñucanchi cunangama cushiyanchi caita yachasha: Señor Jesucristo shamungaraushcái canguna paihuacpi shayaricpiga ñuca ashcata cushiyashami ñucanchi camachishcata canguna quirishcamanda.

²⁰ Chimandami cangunaga ñucanchi premiocuinta anguichi, chiraicumi cangunamanda Diosta alabasha yapa cushiyanchi.

Timoteo shimita apamu

3 ¹⁻³ Chasna ñucanchi cangunata ricunayashcamandami mana mas unaita chapanata munasha, Atenas llactallai sapalla saquirishun nishami Timoteota cangunahuagma cachangarauchi. Paiga ñucanchi quiric huauquimi, Diospacta tarabac man, Jesucristomanda quishpina shimita ñucanchishinallata yachachic man. Chasna acpimi canguna turmintariushcaibi ima yapacta turbarinauchun nisha paita cachauchi cangunata yachachisha yanapangahua, canguna quiriushcata mas sinzhiyachichun nisha. Cangunallata yachanguichimi quiriccuna casna turmintarisha causanata.⁴ Cangunahuan ñucanchi tiyaushcaibi ashca cutin rimaranchi quiriccunaga turmintarina manchi nisha. Chasna rimashcataga yachanguichimi.

⁵ Chiraicu ñucaga mana mas unayanata munashcamanda canguna imasnashaunguna nisha quirishcata yachangahua Timoteota cacharani. Paiguna quirishallachu causaunguna imasnatan nisha, supai Satanás paigunata camasha binsiunzhu imasnatan, quirishachu catiunguna yachagri nishami paita cacharani. Supai cangunata binsicpiga ñucanchi camachishca yanga tucushca anga. Ama chasna yanga tucuchun nishami Timoteotaga cacharani cangunata yanapangahua nisha.

⁶ Pai cangunahuagmarda bulltiamusha ñucanchihuacpi ña pactamushcamí. Cusihuamí rimara paiguna sinzhita quirisha, llaquinacushami causaunguna nisha ñucanchita cuintacshamura. Canguna ñucanchita yapa ricunata munanguichi, chasnallatami ñucanchihuas cangunata

yapa ricunata munanchi. ⁷Chiraicumillaquishca huauquiguna, ñucanchi ashcata turmintariushas canguna sinzhi quirishcata uyasha yapa cushiyanchi. ⁸Canguna Señor Jesusta quirishcata mana saquicpi ñucanchi yapa cushiyasha uyashunmi.

**Pablo paigunamanda
Dioshuan cuintan**

⁹Canguna quirisha ñucanchita cushiyachishcamanda ñucanchihua Diospa ñaupacpi cushiyasha paita yapa pagrachu ninchi. ¹⁰Chasna cushiyashami tutandi punzhandi Diosta mañasha tapuunchi canguna quirina pishishcata ñucanchi mas yachachingahua cangunahuagma ñucanchita cachahuai nishami mañaunchi.

¹¹ Ñaucanchi Yaya Diospas, Señor Jesucristohuas ñucanchita yanapachun ninchi ñucanchi cangunata ricugringahua. ¹²Señor Jesus cangunata yanapachun cangunapura ashcata llaquinacusha causangahua, chasnallata shuccunatahuas llaquingahua imasna ñucanchi cangunata llaquishcacuinta. ¹³Chasna llaquisha Jesus pai sumagyachishca runagunahuan shamushcái cangunaga ñucanchi Yaya Diospacpi shayarishcái cangunataga ima juchas illac sumac manguchi nisha rimangami.

**Alita rasha, llaquisha, sinzhita
tarabasha causanami**

4 ¹Chasna acpi huauquiguna, shuc shimita mas rimanata munani canguna yachanauchun nishami. Yachachiranchi canguna alita causasha Diosta cushiyachinauchun nisha canguna cunan raushcashina. Cunanga Señor Jesucristo ñucanchita japhishcamanda cangunata

rugauchi mas alita rasha causaichi nisha. ²Canguna yachanguichimi Señor Jesucristo ñucanchita mandashcamandami cangunataga alita cunanchi. ³Diosca munanmi canguna ali sumacta causanauchun nisha. Chasna acpiga ima shuc huarmihuan pacalla llutarisha causaichichu. ⁴Randi caran shuc amu pailua quiquin huarmillata japhisa alita causachun. ⁵Diosta mana quiric runashina ima causaichichu. Paigunaga munashcallata yuyarisha causanaunmi, shuc huarmigunata ashiyanallata yuyarishami causaunguna.

⁶Ima chasna raichichu camba quiric huauquitaga. Maican mana alita rauc runataga Señor Jesucristo libachingami cangunata ñuca ñaupa rimashcacuinta. ⁷Dios ñucanchita mana japirochu ñucanchi juchata rasha causangahua nisha, astahuanbas alita causanauchun nishami japiro. ⁸Diosca pailua Ushac Samaita ñucanchima curami. Chimandami pihuas cai yachachishcata mana uyashaga mana runagunallataga uyanzhu, astahuan cangunama quiquin Ushac Samaita cuc Diostaga mana uyaun.

⁹Diosllata cangunata yachachira shuccunata llaquingahua. Chasna acpi quiricpura llaquinacuichi nishami quillcanata mana mas munanichu, basta yachanguichimi.

¹⁰Tucui Macedonia provinciaibi tiyac quiriccunata llaquiunguichimi. Chasna agllaita cangunata rugauchi paigunata mas llaquisha causaichi nisha.

¹¹Cungailla causaichi, sinzhita tarabasha ama shucpi satirichichu, caran amu pailua quiquin causaita cuirachun. Ama quillasha tiyaichichu randi canguna quiquin maquihuan tarabaichi ñucanchi cangunata

mandashcacuinta. ¹²Canguna alita tarabashaga mana minisitinguichichu pihuas canda yanapachun nisha. Chasna rasha causacpiga chi mana quiric runaguna cangunamanda alita yuyaringaunami.

Señor Jesucristo shamun

¹³⁻¹⁴Llaquishca huauquiguna, ñucanchi munanchi canguna alita yachanauchun nisha huañushca runagunamanda. Jesus huañusha cuti causarishcata yachanguichimi. Chasna yachasha yachanchimi tucui Jesusta quirisha huañuc runagunata Dios causachisha Jesushuan apamungami. Chiraicum ñucanchi llaquirishaga mana quiric runacuintami llaquirinch. ¹⁵Señor Jesus ñucanchima yachachishcata cangunama pasachinch: Jesucristo shamucpi chi quirisha causaucuna chara mana sicagllaita huañushca quiriccuna ñaupapunda causarisha sicangaunami. ¹⁶Chi uras shuc uyana shimi sinzhi caparishca uyaricpi, jatun mandac angelba shimi uyaricpis, Diospa curmita uyaricpis, Señor Jesusmi jahuapachamanda uraigusha shamunga. Chasna tucucpi Jesucristota quiric huañushca runagunaga causarisha ñaupata sicangaunami. ¹⁷Chihuashallai ñucanchi chara cai pachai causauc quiriccunaga sicangaraunchi. Paigunahuan pariumi puyugama sicangaraunchi Señor Jesusta huairai tupangahua. Chasna acpi Señor Jesushuan huiñaigama tiyangaraunchi. ¹⁸Chasnamanda cunan cai shimigunahuan cangunapura cushihuan ahuantanacuichi.

Señor Jesus shumunata yuyarisha causaichi

5 ¹Señor Jesus shumunaga ima huatas ima punzhas ima uras

anata cangunata mana quillcana anchi huauquiguna. ²Cangunallata basta yachanguichi shuc shuhuac runa tutachari mana yakashca uras shamushcacuinta Señor Jesucristo shamunaga cungaimanda pactangami. ³Yachanguichimi shuc huarmi pahua huahuata pagarichina uras cungaimanda mana yakashca uras turmuntarina pactamunmi. Chasnallata runaguna alitami causauchi nisha yuyarishcay cungaimanda sinzhi turmuntarina pactamungami. Pactamushcay miticusha nishallata mana ushanaungachu.

⁴Cangunaga quiriccuna asha mana ansa ucuibicuinta aungaichichu huauquiguna. Chiraicu chi turmuntarina punzha mana cangunata manzhachingachu shuhuac runa manzhachishcacuinta. ⁵Diospa huahuaguna asha punzhaibi puriccuinta manguichi, Jesusta quirishcamandami mana ansaibi tiyauchichu. ⁶Randi mana quiric runagunaga puñushcacuinta mana yuyarishachu causanachanchi. Ñaucanchiga yuyarishalla causana manchi. ⁷Tutayacpi runaguna puñushcacuinta machaccuna tuta machanauna, mana yuyarishachu tiyananu. ⁸Ñaucanchiga punzhaibi puriccuinta ashcamanda alita rasha causana anchi ali yuyaihuan. Quirisha, llaquinacusha, Jesus quishpichinata chapasha causashunchi juchaibi ama urmangahua.

⁹Dios ñucanchita mana japirochú ñucanchi libachishca tucungahua, astahanubas ñucanchi Señor Jesucristohuacpi quishpichishca tucungahua japiro. ¹⁰Ñaucanchimanda Señor Jesus huañura ñucanchi pahuan pariu causanauchun nisha. Chasnamanda ñucanchi huañushahuas

causaushahuas paihuan pariu causaunchi.¹¹ Chiraicu cangunapura cushihuan ahuantachinacuichi, yachachisha yanapanacuichi canguna cunan rashcacuinta.

Quiricpura causanamanda

¹² Chasna acpi quiric huauquiguna, cangunata rugauni canguna muntunbi cuirac runagunata llaquichi, uyaichi. Paigunaga Señor Jesucristo japistha asha, yachachisha cunasha yanapanauñmi canguna ali causangahua.¹³ Paiguna Diospacpi tarabashcamandami paigunata ashcata yuyarisha balichisha llaquichi. Cangunapura mana piñanacusha cungailla casilla causaichi.

¹⁴ Cangunata mandanchi quiriccuna, chi quillasha mana alita rac runagunata cunasha ama chasna raichichu nisha sinzhita rimaichi paiguna tarabanauchun nisha. Llaquirishcagunata manzhaisiquigunatas sinzhiyachichi. Mana sinzhi quiriccunata ali yuyaihuan alimanda yanapaichi. Tucui chi runagunata llaquishcahuan alita raichi.

¹⁵ Uyaichi. Shuc runa canda mana alita racpiga cambas ama chasnallata ranguichu. Astahuanbas tucui uras runagunata yanapasha causaichi quiriccunatahuas mana quiriccunatahuas.

¹⁶ Tucui uras cushi causaichi. ¹⁷ Mana saquisha Dioshuan cuintasha causaichi. ¹⁸ Ima tucushahuas Diosta pagrachu nisha causaichi. Dios munanmi Señor Jesucristohua runaguna chasna rasha causanauchun nisha.

¹⁹ Diospa Samai raushcata ama saquichinguiichichu. ²⁰ Diosmanda yachachishca shimigunata ama yanga asinguichichu. ²¹ Astahuanbas tucui shimita uyasha sirtuchu nisha yuyarisha camaichi. Camasha alignata japhisa causaichi. ²² Randi tucui ima mana alignamandas anchurichi.

²³ Cushi causanata cuc Diosca cangunata intiru causaibi sumacta rachun nisha paita mañasha tapuuni. Señor Jesucristo shamunagama Yaya Diosllata cangunata cuirasha canguna shungutas, munaitas, yuyaitas, aichatahuas alichisha jucha illacta rachun nisha mañani. ²⁴ Canda japiu Diosca pactachic asha pai rimashcacuintallatami ranga.

²⁵ Náucanchimanda Diosta mañasha cuintaichi llaquishe huauquiguna.

²⁶ Tucui Jesusta quiriccunata pariu ashca llaquishcahuan saludaunchi.

²⁷ Señor Jesus mandashcacuinta cangunata mandani cai quillcata ricuichi tucui quiriccuna uyanauchun.

²⁸ Señor Jesucristo cangunata llaquisha alita rachun nisha tapuni.

Chillata rimani, Pablo.